

questa tera, così come saranno batute le biave, le debano mandar in questa città.

In questo zorno, la matina, fo fata una bela festa a Mazorbo a S. Maffio, monache observante; sentò la badessa, la qual è et se sagrò monache *videlicet* 8 nobile et 2 non. Queste done è soto el Patriarca. Vi fu li canonici de Castello, et molti zentilhomeni, zentildone et altri, sichè feno un bel pasto, a taola più de . . . persone, poi a le altre taole assà numero, sichè fu fata una belissima festa.

A dì 3. La matina, vene in Collegio sier Polo Bembo stato consolo in Alexandria et impresonato etc., vestito damaschin cremexin et referite poco, perchè el Serenissimo li disse quando haveremo bisogno de vui vi voremo aldir.

Da Milan, de l' orator, fo letto do letere, di 27 et 29. Il sumario scriverò poi.

Vene in Collegio sier Alvise Badoer stato avogador di Comun a Padoa, et ha portà con lui el processo l'ha fato de li de la sublevation dil popolo. *Item*, vene el seeretario de Milan, solicitando li sia dà Scavezacollo, iusta li capitoli.

Introe savio a Tera ferma sier Marco Antonio Grimani fu fato cassier de Collegio, et quello che iusta la parte de Pregadi dia conzar le partide a li camerlenghi de Comun sier Francesco Soranzo, et a li rasonati sier Marco Antonio Grimani, tutti do savi a Terraferma.

Vene l'orator de Anglia per haver audientia col Barozzi cerca el vescoado de Cival de Belun iusta l'ordine auto, et non fo aldito el fatoli dir el venisse doman.

Da poi disnar, fo Conseio di X con la zonta, in materia de biave. Et fo poi leto la suplication de sier Lorenzo Barbarigo tutta, et quela de sier Francesco Barbaro proveditor a le biave che è amalato, se scusono non poter andar fuora, et fo preso. Ave: 8 di no.

Fu preso, dar don a tutti quelli conduriano formenti in questa terra, dal cao Spartivento in qua fino al Tronto, per tutto el mexe de avosto, soldi 20 il staro, de setembrio soldi 15, de octobrio soldi 10 et de novembrio soldi 8, *ut in parte*, includendo in questo *etiam* la Sicilia. *Item*, quelli condurano in questa città dal cao di le Coline in zo a banda destra fuo a la Val . . . , haver debbano di don *ut supra*, per li 4 mexi notadi de sopra, quelli formenti che saranno conduti de Alexandria, Egipto et Soria et di Spagna per tutto el mexe de zener proximo habino de don soldi 30 per staro,

de fevrer soldi 25, de marzo soldi 20, et a tutti li sia dà la trata dil terzo per le terre et lochi nostri, hessendo però in libertà de la Signoria nostra, dar per la ditta tratta soldi 12 il staro. *Item*, che li formenti si possano far condur sopra ogni navilii forestier et raguseo, et farsi asegurar come navilio venetiani per questo anno solamente, et li ragusei venendo con formenti siano trattà come altri navilio forestieri. Et a li doni li sia ubligà li danari a questo deputadi, *ut in parte*. Posta per li cai di X, ave: 28, 0, 1.

Fu preso, di mandar Zuan Dolfin rasonato a 124 Milan, a comprar formenti per conto de la Signoria nostra, et haver la tratta dil duca con la commision li sarà data per il Collegio nostro de le biave, con ducati 40 al mexe.

Fu preso, che l' si praticchi con li patroni de navili, marziane de Veniexia, Dogado, Chioza et altri lochi, per mandar a tuor formenti con più avanzato se potrà haver; et con quello li proveditori sora le biave haverano, vengino in Collegio de le biave, intervenendo li cai di X, et per li do terzi de le balote quello sarà deliberà sia fermo.

Et licentiatò la Zonta, restò el Conseio semplice con il Collegio, intervenendo

A dì 4. La matina, non fo lettere da conto. Intro li cai di X, et fono in materia de biave et de alcuni mercadi che vol far uno Zulian de Donati per nome de Hironimo Oxereti zenoese, el qual si obliga far condur de qui stera 30 milia per il mexe di . . . a lire 9, soldi 10 el staro, et vol imprestado dueati 9000, dando bone piezarie, da esser balotate nel

Noto. Eri matina in Quarantia Criminal fo expedito el caso de Zuan Antonio di Naxi sorastante di rami et stagni in fontego di Todeschi, menado per sier Piero Morexini et sier Gabriel Venier avogadori extraordinari. Da poi molti consigli et disputation per li avogadori et avocati, fu preso el procieder: 16, 9, 6. Et preso che l' sia privo in perpetuo di l' officio l' havea et de ogni altro officio in fontego de Todeschi, et pagì a la Signoria nostra tutto quello sarà terminà per li avogadori sopraditti, et pubblicà la soa condanason.

Et questa matina fo expedito el caso de sier Zuan Battista Barbo, qu. sier Lorenzo, absente, ma proclamado, qual amazò sua sorella fo moier di sier Carlo Contarini di sier Panfilo, in barca, et preso el procieder, andò do parte: l' una per li Consieri